

0
1cm
2
3
4
5
6
7
8
9
10
11
12
13
14
15
16
17
18
19
20
21
22
23
24
25
26
27
28
29
30



浙江圖書館

deli 得力 No. 6230



浙江圖書館



浙江圖書館



浙江圖書館

宋元通鑑卷第一百三十三

武進薛應旂編集

元紀五

起壬辰至甲午
凡三年

世祖五

至元二十九年春正月甲午朔日食免朝賀 甲辰

詔江南州縣學田其歲入聽其自掌春秋釋奠外以

廩師生之無告者貢士莊田則令覈數入官 開通

惠河以郭守敬領都水監事初守敬言水利十有一

事其一欲導昌平縣白浮村神山泉過雙塔榆河引

一畝玉泉諸水入城匯於積水潭復東折而南入舊

河每十里置一牐以時蓄洩帝稱善復置都水監命
守敬領之丞相以下皆親操畚鍤爲之倡置牐之處
往往於地中得舊時斲木人服其識逾年畢工自是
免都民陸輓之勞公私便之帝自上都還過積水潭
見舳艫蔽水大悅賜名曰通惠 詔江南避亂者令
復業時江南福建諸路連歲盜起居民多入山谷自
保羣盜皆以次就平江西左丞高興言乞招諭復業
詔從之 二月己巳申禁鞭背 乙亥以亦黑迷失
史弼高興並爲福建行省平章政事將兵擊瓜哇初
右丞孟淇使瓜哇瓜哇黥其面使還帝怒命亦黑迷

失及史弼等將兵三萬伐之時瓜哇國王爲鄰境葛郎國所殺其婿土罕必闍耶迎弼求掠弼等遂并取葛郎國王以歸旣而土罕必闍耶復叛弼等力戰却之得還死者三千餘人有司計其俘獲貨貝直五十餘萬帝以其亡失太多及治其縱土罕必闍耶之罪弼與亦黑失沒家貲三之一唯興以不與議得免

三月壬寅御史大夫月兒魯等奏比御史商琥舉昔任詞垣風憲時望所屬如胡祇遹姚璉王暉雷膺陳天祥楊恭懿高道程鉅夫陳儼趙居信十人宜召置翰林備顧問帝曰朕未深知俟召至以聞 丁未誅

桑哥黨納速刺丁等初桑哥既敗納速刺丁滅里忻
都王巨濟等俱逮下獄至是御史臺言其黨比桑哥
恣爲不法理筭江南錢穀極其酷虐民嫁妻賣女殃
及親鄰維揚錢塘受禍最慘無辜死者五百餘人天
下之人莫不思食其肉今三人既已伏辜乞誅之以
謝天下帝以忻都長於理財欲釋之不忽木力爭不
可日中凡七奏卒併誅之己酉麥朮督丁罷以鐵
哥刺真並爲平章政事麥朮督丁嘗請復立尚書省
專領右三部不忽木曰阿合馬桑哥相繼誤國身誅
家滅前鑒未遠柰何又欲效之乎事遂寢至是以久

居其任免猶與議省事鐵哥初爲司農寺達魯花赤
從獵百查兒之地獵者射兔誤中名駝帝怒命誅之
鐵哥曰殺人償畜刑太重帝曰誤耶史官必書亟釋
之庾人有盜秬罪應死鐵哥曰臣鞠之其人母病盜
以養母耳請貸其死至是進平章政事以病足聽肩
輿上殿 庚戌帝如上都 徵集賢學士楊恭懿恭
懿奉元人至元初與許衡俱被召屢辭不起太子真
金令有司以漢聘四皓故事聘之至京師與定科舉
之議及考正曆法曆成授集賢學士兼太史院事即
辭歸自是復屢召之皆不起至是監察御史商琥上

書薦天下名士胡祇適等十餘人而恭懿與焉詔起
恭懿叅議中書省事亦辭不至尋卒 夏四月辛卯

設雲南諸路學校其教官以蜀士充 五月丁未中

書省臣言妄人馮子振嘗爲詩譽桑哥及桑哥敗即

告詞臣撰碑引諭失當國史院編脩陳孚發其姦狀

帝曰詞臣何罪使以譽桑哥爲罪則在廷諸臣誰不

譽之朕亦嘗譽之矣詔以楊居寬郭佑死非其罪給

還其家貲 六月甲子兩浙常鎮諸路水詔免田租

一百二十五萬七十餘石 閏月廣西上思州土官黃

聖許擁衆二萬結交阯爲援寇陷忠州江州及華陽

諸縣詔遣程鵬飛討之。聖許尋敗走入交阯。張立
道至安南謂其王日燁曰：昔鎮南王不用嚮道，率衆
深入不戰自潰。天子亦既知之。汝所恃者山海之險，
瘴癘之惡，而雲南嶺南之人與汝習俗同而技力等。
今發而用之，繼以北方之勁卒，汝能復抗哉？且前年
之師，殊非上意。邊將讒汝耳。汝曾不悟，稱兵抗拒。逐
我使人，今禍且至矣。日燁泣謝，出奇寶爲賄。立道却
之，因要其入朝。日燁曰：貪生畏死人之常情，誠有詔
貸以不死，臣將何辭？乃先遣其臣何惟巖阮代之。隨
立道上表謝罪，脩歲貢之禮如初。且言所以願朝之

意時有忌立道之功者言必先朝而後可赦日燁懼
卒不至 秋七月壬申建社稷于和義門內壇各方
五丈高五尺白石爲柱飾以五方色土壇南植松一
株北墉瘞坎壇垣悉倣古制別爲齋廬門廡三十三
楹 八月甲辰帝還大都 戊午罷福建銀冶初福
建叅知政事魏天祐獻計發民一萬鑿山煉銀歲可
得萬五千兩天祐乃賦民鈔市銀輸官而私其百七
十錠至是臺臣以聞請追其贓而罷銀冶從之 改
燕南河北廉訪司還治真定 高麗女直界告饑敕
高麗王於海運內量以粟賑之 遣忙兀魯迷失以

軍征八百媳婦國。九月辛酉復遣吏部尚書梁曾
史院編脩陳孚使安南徵其王入朝時以張立道旣
還日燔不至故持詔往徵之。冬十月癸丑右丞相
完澤等言一歲天下所入凡二百九十七萬八千三
百五錠其中有未至京師而在道者有就給軍旅及
織造物料館傳俸祿者自春及冬凡出三百六十三
萬八千五百四十三錠出數已逾入數六十六萬一
百三十八錠矣今後賜諸近侍亦宜有節帝嘉納之
十一月壬戌太陰犯太微東垣上相。癸未禁所
在私渡命關津譏察姦宄。十二月庚寅改封梁王

甘麻刺爲晉王鎮北邊甘麻刺太子真金長子也至
元初已嘗出鎮北邊復封梁王移鎮雲南至是復改
封晉王鎮漠北統領太祖四大幹耳朶之地幹耳朶
猶華言宮室也王天性仁厚御下有恩民賴以安

癸巳中書省臣言寧國路民六百戶鑿山冶銀歲
額二千四百兩皆市銀以輸官未嘗採之于山乞罷
之制曰可 諸王明里鐵木兒附海都以叛詔伯顏
討之伯顏兵至阿撒忽禿嶺明里鐵木兒已據之矢
下如雨伯顏先登陷陣諸軍爭奮大破之明里鐵木
兒僅以身走伯顏軍還遇伏兵復擊敗之斬首二千

級俘其餘衆以歸。以張珪爲江淮行樞密副使。珪弘範子也。時爲管軍萬戶。入朝。帝欲用爲樞密副使。王昔帖木兒曰：珪尚少，果欲大用，可俟他日。帝曰：不然，其家爲國滅，金滅宋盡死力者三世矣，而可吝此遂有是拜。以程鉅夫爲閩海道肅政廉訪使。鉅夫興學明教，吏民畏愛之。

三十年春正月丙寅，中書汰冗員。凡省內外官府二百五十五所，總六百六十九員。戊辰，詔邊境無事，令本軍屯耕以食。庚午，捏怯烈女直二百人以漁。自給。帝曰：與其漁於水，曷若力田？其給牛價農具使

之耕 辛巳置遼陽路慶雲至合里賓二十八驛

始置社稷至元初已詔歲祀然未立壇壝至是始用
崔彧言置之 二月己丑以楊璉真加子暗普爲江
浙行省左丞尋以江南民怨楊璉真加不已罷之

丁酉回回孛可等獻大珠邀價鈔數萬錠帝曰珠何
爲當留是錢以賙貧者 丁未帝如上都 三月甲

子括諸路馬時以海都入寇詔羣臣議所以爲備從
樞密李庭言復括天下馬凡得十一萬匹 夏四月
己亥大司農燕公楠翰林學士留夢炎言杭州上海
澈浦温州慶元廣東泉州置市舶司凡七所唯泉州

物貨三十取一餘皆十五抽一乞以泉州爲定制從之仍併温州船司入慶元杭州船司入稅務劉因卒因字夢吉保定容城人性不苟合家雖甚貧非其義一介不取家居教授師道尊嚴徵爲贊善大夫尋以疾辭再徵不起學者稱爲靜脩先生五月癸亥括思播等處亡宋涅手軍丁丑中書省臣言上都工匠二千九百九十戶歲糜官糧萬五千二百餘石宜擇其不切于用者俾就食大都從之六月乙巳有譖伯顏久居北邊與海都通好因仍保守無尺寸之獲者詔授皇孫鐵木耳以皇太子寶撫其軍以太

傳玉昔帖木耳輔行召伯顏居大同以俟後命玉昔
帖木耳未至三驛海都兵復至伯顏遣人語玉昔帖
木耳曰公姑止待我翦此寇而來未晚也遂與海都
兵交且戰且却凡七日諸將以爲怯憤曰果懼戰何
不授軍於太傅伯顏曰海都懸軍涉吾地邀之則遁
誘其深入一戰可擒也諸君必欲速戰若失海都誰
執其咎諸將曰請任之即還軍擊敗之海都果脫去
乃召玉昔帖木耳至軍中授以印而行皇孫舉酒餞
之曰公去何以教我伯顏舉所酌酒曰可慎者惟此
與女色耳 秋七月壬申以月赤察兒知樞密院事

月赤察兒博爾忽孫也由長怯薛授宣徽使從帝北
征奏曰安童伯顏月呂魯皆嘗受命征伐三人者臣
不可以後之臣願躬出一戰帝曰爾以安童輩與爾
家同功一體各立戰功耻不逮耶然躬親侍衛厥功
非小何必踐行伍乃快心耶桑哥之敗實月赤察兒
潛奏劾之至是乃有是拜 八月庚寅安南遣使入
貢詔安置於江陵復議舉兵伐之初梁曾等至安南
其國有三門日蹲欲迎詔自旁門入曾貽書責之往
復者三卒從中行且諷之入朝日蹲不從遣其臣陶
子竒偕曾來貢曾進所與日蹲辯論書帝大悅解衣

賜之令坐地上右丞阿里意不然帝怒曰梁曾兩使外國以口舌息干戈爾何敢爾時有親王至自和林帝命酌酒先賜曾謂親王曰汝所辦者汝事梁曾所辦者吾與汝之事汝勿以爲後也或讒曾受安南賂遺帝以問曾曾曰安南以黃金器幣竒物遺臣臣不受以屬陶子竒帝曰受之亦何不可廷臣以日躔終不入朝遂拘留子竒于江陵命劉國傑與諸王亦里吉斛等整兵聚糧復議伐之九月癸丑朔帝還大都冬十月庚寅彗出紫微垣帝憂之夜召不忽木入禁中問所以銷天變之道不忽木曰風雨自天而

至人則棟宇以待之江河爲地之限人則舟楫以通
之天地有所不能者人則爲之此人所以與天地參
也且父母怒人子不敢疾怨起敬起孝故易曰君子
以恐懼脩省詩曰敬天之怒三代聖王克謹天戒鮮
不有終漢文之世同日山崩者二十有九日食地震
頻歲有之善用此道天亦悔禍海內又安此前代之
龜鑑也願陛下法之因誦文帝日食求言詔帝悚然
曰此言深合朕意可復誦之遂論說至四更乃罷
甲辰赦天下 辛亥禁江南州郡以乞養良家子轉
相販鬻及強將貧民畧賣者 十一月己卯以河南

江北行省平章伯顏入爲中書省平章政事位不忽
木上 十二月庚子平章政事亦黑迷失史弼高興
等征交趾無功而還各杖而耻之仍沒其家貲三之

一

書

三十一年春正月壬子朔帝不豫免朝賀 癸亥知

樞密院事伯顏至自軍中 庚午帝大漸癸酉帝崩

于紫檀殿在位三十五年八十 梁寅曰元之有

天下殊方絕域靡不臣服輿圖之廣亘古所無然世

祖之約不以漢人爲相故爲相皆國族而又不置諫

官使忠路塞文學之士雖世世不乏而沉於下僚莫

究其用所賴以爲用者唯吏師而已其爲法如是是以朝皆苟且之政而士無謇諤之風官有貪婪之實而吏多欺誑之文將求保萬邦比隆三代無乃未之思乎 乙亥葬帝起輦谷谷在漠北不加築爲陵諸帝皆從葬於是 御史中丞崔彧得傳國璽獻之時木華黎曾孫碩德已死而貧其妻出玉璽一鬻之彧以告彧召秘書監丞楊桓辯其文曰受命于天旣壽未昌此歷代傳國璽也遂獻之故太子妃弘吉刺氏出以徧示羣臣丞相以下次第上壽慶曰神寶之出實當宮車晏駕之後此乃天意屬於皇太孫也乃遣

右丞張九思齋授之。夏四月甲午，皇孫鐵木耳即位於上都。大赦。時鐵木耳自軍中來奔喪，及宗室諸王會於上都，定策之際，親王有違言者，王昔帖木兒曰：「宮車宴駕，神器不可久虛。且昔太子寶既有所歸，晉王宗盟之長，何俟而不言？」伯顏亦握劍立殿，陛宣揚顧命，述所以立皇孫之意，辭色俱厲。諸王皆股栗趨殿下拜。丙午，中書右丞相完澤及文武百官議上尊謚。壬寅，始爲壇於都城南七里。甲辰，遣司徒兀都帶平章政事、不忽木左丞張九思率百官請謚於南郊。五月戊午，遣攝太尉兀都帶奉冊謚先帝曰

聖德神功文武皇帝廟號世祖國語尊稱曰薛禪皇
帝是日完澤等議追尊皇考曰裕宗皇帝尊母弘吉
刺氏曰皇太后改所居舊太子府爲隆福宮 以玉昔
帖木兒爲太師伯顏爲太傅月赤察兒爲太保 罷
伐安南兵釋其使歸國 六月庚辰朔日食 辛巳
御史臺臣言名分太重無踰宰相惟事業顯著者可
以當之不可輕授廉訪司官歲以五月分按所屬次
年正月還司帝曰其與中書議行 壬辰復以帖木
兒爲平章政事 辛丑賜宋使臣家鉉翁還鄉初世
祖欲官鉉翁不受遂安置河間以春秋教授弟子數

爲諸生談及宋興亡之故輒流涕太息至是年逾八十詔賜號處士放還鄉里錫予金幣皆不受尋卒鉉翁眉州人以廕補官先知常州政譽翕然歷戶部侍郎賜進士出身拜端明殿學士僉書樞密院事使元不屈乃獲全歸云 甲辰詔翰林國史院脩世祖實錄召趙孟頫還京師以完澤監脩國史 秋七月壬戌詔中外崇奉孔子 癸酉以陝西行省平章不忽木爲中書平章政事初世祖崩時不忽木爲中書平章得預顧命丞相完澤以其年位在下深忌之帝知其故慰勞之曰卿先朝腹心惟朝夕啓沃匡朕不逮

庶無負先皇帝付托之重廷議大事多采其言河南
守臣獻嘉禾不忽木曰汝部內所產盡如是邪曰惟
此數莖耳不忽木曰如此則既無益於民何足爲瑞
遂罷遣之西僧作佛事請釋罪囚祈福謂之禿魯
麻豪民犯法者皆賂之以求免有殺主殺夫西僧請
被以帝后服乘黃犢出宮門釋之云可得福不忽木
曰人倫者王政之本風化之基豈可容其亂法如是
帝責丞相曰朕戒汝無令不忽木知今聞其言朕甚
媿之使人語不忽木曰卿且休朕今從卿言有奴告
主者主被誅即以其主所居官與之不忽木言若此

必大壞天下風俗無復上下之分矣帝悟爲追廢前
命丞相以下多與謀議不合奏以爲陝西行省平章
政事太后謂帝曰不忽木朝廷正人先皇帝所付托
豈可出之於外邪乃復留之 八月庚辰太白晝見
戊子初祀社稷用堂上樂歲以爲常戊戌太陰犯畢
太白犯軒轅 九月壬子聖誕節帝駐蹕三部落受
諸王百官賀丁巳太白經天 冬十月戊寅帝至大
都帝巡狩三不刺之地董文用言先帝新棄天下陛
下巡遊不以時無以慰安元元且人君猶北辰居其
所而衆星拱之不在勤遠畧也宜趣還京師帝悟遂

還 辛巳弛江西銀冶課額江西省臣言銀冶歲輸

萬一千兩而未嘗及數民不能堪命自今從實辦之

不爲額 十一月丁未朔帝朝太后于隆福宮 庚

戌詔京師犯贓罪者三百人事無疑者准世祖所定

十三等例決之 辛亥中書省臣言國賦歲有常數

先帝嘗曰凡賜與雖有朕命中書其斟酌之由是歲

務節約常有盈餘今諸王藩戚費耗繁重恐無以給

乞俟臣等酌量定擬以聞從之 壬子詔罷湖廣江

西及江淮等處各行樞密院江南省臣以軍民不相

統一累請罷之帝以問伯顏伯顏對曰內而省院各

置爲宜外而軍民分隸不便帝從之遂罷三院以其
事歸行省 丁巳以伯顏察兒叅議中書省事其兄
伯顏曰臣叨平章政事兄弟宜相嫌避帝曰卿勿復
言兄平章于上弟叅議于下何所嫌也 庚申太陰
犯畢 甲子詔禁作姦犯科者以湖南道宣慰使何
瑋爲中書叅知政事初帝諭右丞阿里叅政梁德珪
曰中書政務卿等皆懷怠心又不約束吏曹使選人
留滯桑哥雖姦邪然僚屬憚其威政事無不立辦卿
等其約所屬不事事者懲之時省臣凡十一人至是
以瑋叅知政事瑋曰古者一相專任賢也今宰執員

允政出多門轉相猜忌請損之不從 癸酉太白犯
房詔改明年爲元貞元年 十二月太傅知樞密院
伯顏卒伯顏深沉有謀畧善斷將二十萬衆伐宋如
將一人諸將仰之若神明還朝未嘗言功卒贈太師
追封淮安王謚忠武 戊戌禁侵擾農桑者

浙 江 圖

宋元通鑑卷第一百三十三

浙江圖書館

宋元通鑑卷第一百三十三

一四

宋元通鑑卷第一百三十四

武進薛應旂編集

元紀六

起乙未至戊戌凡四年

成宗一

元貞元年春正月以劉國傑爲湖廣平章政事辰澧地接溪峒宋嘗選民立屯免其繇役使禦諸蠻在澧日隘丁在辰日寨兵宋亡皆廢國傑悉復其制又視盜出沒之地置戍三十八所分屯將士以守之由是東盡交廣西亘黔中周湖廣四境皆有屯戍制度周密諸蠻不能復寇入朝賜玉帶錦衣旌其功臺臣言

國傑在軍中每傾家貲賞賚將士帝命估償之 二
月丁酉帝如上都 翰林學士承旨留夢炎告老上
以其在先朝言無所隱厚賜遣之 論曰宋亡陳宜
中爲相遁去占城不返已無復天理民彝矣顧又有
留夢炎者爲宋狀元宰相俛首降元甘心臣僕每爲
元主所鄙而恬然竊其豢養曾狗彘之不若宋稱節
義最多乃復有此類焉所謂亂臣賊子無代無之豈
科目不足以得人哉 三月乙巳朔安南入貢 壬
戌地震 丙寅增置蒙古學政以肅政廉訪司領之
夏四月癸卯設各路陰陽教授仍禁陰陽人不得

游於諸王駙馬之門。帝以京師米貴，益廣世祖之制，設三十肆，發米七萬餘石糶之。其移每年增糶多至四十萬石，行之既久，多爲豪強巧取，乃令有司籍貧民戶數，驗口給之，減賑糶之直三分之一。每歲亦不下二十餘萬石。閏月丙午，爲皇太后建佛寺於五臺山。以工部尚書將作院使董其役，以大都保定真定平陽太原大同河間大名順德廣平十路應其所需。是月，蘭州上下三百餘里河清三日。五月，戊寅，省臣言阿合馬桑哥怙勢賣官，不別賢否，選法大壞，乃詔麥朮督丁與何榮祖等釐正之。庚辰，陞

江南諸縣為州以戶為差戶四萬五萬者為下州五萬至十萬為中州下州官五員中州六員凡為中州二十八下州十五又以連州戶不及額降路為州

丙申以伯顏之子買的為僉書樞密院事太后言其父盡心王室欲令代其父官帝以其年尚少故有是

命是月饒州鎮江常州湖州平江建康常德澧州

皆水六月壬子詔遼陽省進海東青鶻二十四驛

每驛給牛六頭使者食米五石鷹食羊五口甲寅

翰林承旨董文用等進世祖實錄是月陝西旱饑

行省右丞許扈議發廩賑之同列以未經奏請不可

辰曰民爲邦本今饑餒若此若俟命下無及矣擅發
之罪吾當任之遂發粟賑貸 秋七月丁丑太陰犯
亢御史臺臣言盜賊竊發者衆由國家寬貸所致乞
命中書立爲條格督責所屬期至盡滅制曰可乙卯
詔申飭中外有儒吏兼通者各路舉之廉訪司每道
歲貢二人省臺立法考試中程者用之所貢不公罪
其舉者 壬寅詔易江南諸路天慶觀爲玄妙觀毀
所奉宋太祖神主 八月汴梁安西真定等路旱平
江安豐等路大水 九月甲戌帝還大都 庚辰罷
寧夏路行中書省併入甘肅行省 冬十月甲寅江

浙行省平章明理不花陳臺諫非便事臣等議自今
御史廉訪司有所按覈州縣官與本路同鞠路官與
宣慰司同鞠宣慰司與行省同鞠制曰可 十一月
甲戌太白經天 玉昔帖木兒卒 十二月丁卯禁
諸王輒召有司官吏時諸王小薛等部曲率恣橫擾
民駙馬蠻子台私殺有罪有司官吏輒被號召至是
詔令非奉旨毋輒加罪 立皇后伯岳吾氏
二年春正月丙戌太白晝見安西王傅鐵赤脫鐵木
兒等復請立王相府帝曰去歲阿難答已嘗面陳朕
以世祖定制諭之今復奏豈欲以四川京兆悉爲彼

有邪賦稅軍站皆朝廷所司今姑從汝請置王相府
惟行王傳事 己丑御史臺臣言漢人爲同寮者嘗
爲姦人捃摭由是不敢盡言請於近侍昔竇赤速古
兒赤中擇人用之帝曰安用此曹其選漢人識達事
體者爲之 二月己亥朔中書省臣言陛下御極以
來所賜諸王公主駙馬勲臣爲數不輕向之所儲散
之殆盡今繼請者尚多臣乞甄別貧匱及赴邊者賜
之其餘宜悉止從之 庚申自六盤山至黃河立屯
田置軍萬人 丙寅以不忽木爲昭文館大學士平
章軍國事段貞爲平章政事時不忽木以與同列多

異議久稱疾不出帝曰朕知卿疾之故以卿不能從
人人亦不能從卿也欲以段貞代卿如何不忽木曰
貞實勝臣乃拜不忽木平章軍國重事辭曰是職也
國朝惟史天澤嘗爲之臣不敢當制去重字而以貞
代爲平章政事 三月壬申罷太原平陽路釀進葡
萄酒其葡萄酒園民恃爲業者皆還之 丙子帝如上
都 夏四月平陽之絳州台州之黃巖饑杭州火並
賑之 五月戊辰朔免兩都徭役辛未安西王遣使
來告貧乏帝語之曰世祖以分賚之難嘗有聖訓阿
難答亦知之矣若言貧乏豈獨汝邪去歲賜鈔二十

萬錠又給以糧今與則諸王以爲不均不與則汝言人多饑死其給糧萬石擇貧者賑之是月河中府之猗氏電太原之平晉獻州之交河樂壽莫州之莫亭任丘及湖南醴陵皆水濟寧螟六月己亥御史臺臣言官吏受賂初旣辭伏繼以審覈而有司徇情致令異辭者乞加等論罪從之甲寅頒官吏受賕條格凡十三等南臺御史大夫阿瓦老丁言立法貴於輕重得宜使民不至易犯今所降條格除枉法外其不枉法者自二十兩以下罪與受一分者同科似輕重少偏是月大都真定保定太平常州鎮江紹

興建康澧州岳州廬州汝寧龍陽漢陽濟寧東平大名滑州德州蝗大同隆興順德太原雹海南民饑各發粟賑之 秋七月癸酉詔雲南福建官吏滿任者給驛以歸 壬午括伯顏阿木阿里海牙等所據江南田及權豪隱匿者令輸租 敕增江西河南省叅政一員以朱清張瑄爲之授特進上柱國 八月乙巳立捕盜賞格御史臺臣言內地盜賊衆多乞立條格督責所屬期至盡滅乃詔諸人能告捕者強盜一名賞鈔五十貫竊盜半之應捕者又半之皆徵諸犯人無可徵者官給之時山東東西道廉訪使陳天祥

上疏曰盜賊之起各有所因除歲凶誘之天時宜且
勿論如軍旅不息工役游興厚斂煩刑皆足致盜中
間保護滋長之者赦令是也赦者小人之幸君子之
不幸彼強梁之徒執兵殺人有司盡力以擒之朝廷
加恩以釋之且脫係累暮即行劫既不感恩又不畏
法夫凶殘悖逆性已預定誠非善化所能移惟嚴刑
以制之可也天祥既上疏乃嚴督有司追捕自其所
部南至漢江二千餘里多就擒者 九月辛未聖誕
節帝駐蹕安同泊受諸王百官賀 壬申太陰掩南
斗 冬十月甲辰脩大都 壬子帝還大都詔職官

坐賊經斷再犯者加本罪三等 贛州民劉六十聚
衆至萬餘建立名號朝廷遣將討之觀望退縮賊勢
益盛江南行省左丞董士選請自往進至興國距其
營不百里命將校分兵守地悉置激亂之人於法復
誅奸民之爲囊橐者於是民爭出自效數日六十就
擒餘衆悉散事平士選遣使奏聞但請黜賊吏數人
而已畧不及破賊事時稱其不伐 十一月己巳兀
都帶等進所譯太宗憲宗世祖實錄帝曰忽都魯迷
失非昭睿順聖太后所生何爲亦曰公王順聖太后
崩時裕宗已還自軍中所紀月日先後差錯又別馬

里思丹砲手亦思馬因泉府司皆小事何足書邪

辛未增海運明年糧爲六十萬石 乙酉樞密臣言

江南近邊州縣宜擇險要之地合羣戍爲一屯卒有
警急易於徵發詔行省圖地形覈軍實以聞 十二

月戊戌立徹里軍民總管府雲南行省臣言大徹里
地與八百媳婦大牙相錯今大徹里胡念已降小徹
里復占扼地利多相殺掠胡念遣其弟胡倫乞別置
一司擇通習蠻夷情狀者爲之帥招其來附以爲進
取之地 是年天下諸處多水旱蟲螟及大風損禾
大德元年春正月丙戌昔寶赤等爲叛寇所掠仰食

于官賜以農具牛種俾耕種自給 辛卯以也先帖

木兒爲平章政事張斯立爲叅知政事 二月丙申

蒙陽甸酋長納欵來獻方物且請歲貢銀千兩及置

驛傳詔即其地立通西軍民府 甲申諸軍民相訟

者命軍民官同聽之 己未改福建省爲福建平海

等處行中書省徙治泉州平章政事高興言泉州與

瑠球相近或招或取易得其情故徙之 詔改元大

德赦天下 三月丙子帝如上都 丁亥五臺山佛

寺成太后將親往祈祝監察御史李元禮上疏曰古

人有言曰生民之利害社稷之大計惟所見聞而不

係職司者獨宰相得行之諫官得言之今朝廷不設
諫官御史職當言路即諫官也烏可坐視得失而無
一言以裨益聖治萬分之一哉伏見五臺山創建寺
宇工役俱興供億煩重民不聊生伏聞太后臨幸五
臺尤不可者有五盛夏禾稼方茂民食所仰騎從經
過不無蹂躪一也親勞聖體經冒風日往復數千里
山川之險萬一調養失宜悔將何及二也天子舉動
必書簡冊以貽萬世書而不法將焉用之三也財不
天降皆出于民今日支持調度百倍曩時而又勞民
傷財以奉土木四也佛以慈悲爲教雖窮天下珍玩

供養不爲喜雖無一物爲獻亦不怒今太后欲爲兆
民祈福而先勞聖體使天子曠定省之禮五也伏望
回轅中道端處深宮上以循先皇后之懿範次以盡
聖天子之孝誠下以慰元元之望如此則不祈福而
福自至矣臺臣不敢以聞其後侍御史萬僧與中丞
崔彧有隙取元禮章封入奏之曰崔中丞私比漢人
李御史爲大言謗佛謂不宜建寺帝大怒敕完澤不
忽木鞠之完澤曰往吾亦嘗以此諫太后曰我非喜
建此寺蓋先帝嘗許爲之非汝所知也不忽木曰他
御史懼不敢言言者惟一元禮可賞也完澤等入言

之帝沉思良久曰御史言是也乃罷萬僧復元禮職
初司程陸信等董建寺之役驅迫民夫數千冒險
入山谷伐木運石死者萬餘人河東廉訪使王忱乘
太后幸五臺因言建寺本以福民今福未及而害已
甚恐非朝廷意也太后聞之爲減其役仍賜恤死者
之家 夏四月癸巳朔日食 丙申中書省御史言
阿老瓦丁及崔或條陳臺憲諸事臣等議乞依舊例
御史臺不立選其用人則於常調官選之惟監察御
史首領官令御史臺自選各道廉訪司必擇蒙古人
爲使或闕則以色目世臣子孫爲之其次叅以色目

漢人又合刺赤阿速各舉監察御史非便亦宜止於
常選擇人各省文案行臺差官檢覈宿衛近侍奉特
旨令臺憲擢用者必須明奏然後任之行臺御史秩
滿而有効績者或遷內臺或呈中書省遷調廉訪司
亦如之其不稱職者省臺擇人代之未歷有司者授
以牧民之職經省臺同選者聽御史臺自調中書省
或用臺察之人亦宜與御史臺同議各官府憲司官
毋得輒入體察今擬除轉運鹽使司外其餘官府悉
依舊例制曰可 五月丙寅河決汴梁發民三萬餘
人塞之 六月甲午諸王也里干遣使乘驛祀五嶽

四瀆命追其驛券仍切責之以湖廣行省叅政崔良
知廉貧特賜鹽課鈔千錠 秋七月丁亥河決杞縣
蒲口先是河決汴梁發丁夫三萬塞之至是蒲口復
決乃命廉訪使尚文相度形勢爲久利之策文言河
自陳留抵淮東西百有餘里南岸視水高六七尺或
四五尺北岸故隄水視田高三四尺或高下等大較
南高於北約八九尺隄安得不壞水安得不北也蒲
口今決千有餘步東走歸舊瀆行二百里至歸德橫
隄之下復合正流或疆遏之上決下瀆功不可成揆
今之計河北郡縣宜順水性築長隄以禦汎溢歸德

徐邳之民任擇所便避其衝突被害民戶量給河南
退灘地以爲業異時決他所亦如之亦一時救患之
良策也蒲口不塞便帝從之會河朔郡縣及山東憲
部爭言不塞則河北桑田盡化魚鱉之區塞之便帝
復從之是後蒲口復決障塞之役無歲無之而水北
入河復故道竟如文言 八月丁巳祆星出奎 九
月壬午帝還大都 冬十月欽察都指揮使牀兀兒
攻破八鄰之地還擊海都軍敗走之八鄰之地時爲
海都所據牀兀兒帥師於金山進攻之其將怙良臺
阻答魯忽河而軍伐木柵岸以自庇士皆下馬跪坐

持弓矢以待牀兀兒奮師馳擊大破之盡得其人馬
廬帳還次阿雷河與海都援將孛伯遇牀兀兒麾軍
渡河蹙之孛伯敗走僅以身免 以吳元珪爲吏部
尚書時選曹銓注多有私其鄉人者元珪曰此風不
可長蜀黨朔黨之興宋之所由衰也自視事請謁悉
皆謝絕 十一月戊辰增太廟牲用馬 丁丑大都
路總管沙的坐賊當罷帝以故臣子特減其重罪俾
仍舊職崔彧言不可復任帝曰卿等與中書省臣戒
之若後復然則置之死地矣 十二月戊戌中書省
臣言世祖撫定江南沿江上下置戍兵三十一翼今

無一二懼有不虞帝曰與樞密議之 閏月壬戌詔

諸軍戶賣田者由所隸官給文券 甲子福建平章

高興言漳浦縣大梁山產水晶乞割民百戶采之帝

曰不勞民則可勞民勿取 是歲虞集至京師以大

臣薦授大都路儒學教授尋除國子助教所至以師

道自任

二年春正月壬辰詔以水旱減郡縣田租十分之三

傷甚者盡免之老病單弱者差稅並免三年禁諸王

公主駙馬受諸人呈獻公私田地及擅招戶者 二

月丙子帝諭中書省臣曰每歲天下金銀鈔幣所入

幾何諸王駙馬賜與及一切營建所出幾何其會計以聞右丞相完澤言歲入之數金一萬九千兩銀六萬兩鈔三百六十萬錠然猶不足於用又於至元鈔本中借二十萬錠自今敢以節用爲請帝嘉納焉罷中外土木之役 乙酉帝如上都詔廉訪司作成人材以備選舉詔諸郡凡民播種怠惰及有司勸課不至者命各道廉訪司治之 丙子以張九思梁德珪並爲平章政事初太子真金卒朝議欲罷詹事院九思時爲詹事丞抗言曰皇孫宗社人心所屬詹事正所以輔成道德者奈何罷之尋進拜中書左丞德珪

一名梁諳都刺世祖時叅知政事治事有敏才京師地震世祖怪州郡報囚之數過多德珪曰當國者急於徵索蔓延收繫以致此爾帝悟爲赦中外逋負尋拜右丞開鐵幡竿渠召郭守敬至上都議之守敬曰頻年山水暴下非大爲渠堰廣五七十步不可執政吝於工費以其言爲過縮其廣三之一明年大雨山水注下渠不能容漂没人役廬帳幾犯行殿帝謂省臣曰郭太史神人也惜其言不用爾三月庚寅以兩淮閒田給蒙古軍浙壬子詔加封東鎮沂山爲元德東安王南鎮會稽山爲昭德順應王西鎮吳山

爲成德末靖王北鎮醫巫閭山爲貞德廣寧王歲時
與嶽瀆同祀著爲令式夏四月江南山東江浙兩
淮燕南屬縣百五十處蝗五月壬辰以何榮祖爲
平章政事六月庚申御史臺臣言江南在宋時行
兩稅法自阿里海牙下湖廣罷宋夏稅用內郡例改
科門攤每戶一貫二錢蓋是夏稅增鈔五萬餘錠至
是宣慰張國紀復請科夏稅與門攤併徵湖湘重罹
其害御史臺以爲言詔趣罷之尋復改門攤爲夏稅
而併徵之每戶計三貫四錢之上視江浙江西爲差
重云是月山東河南燕南山北遼東大寧等處蝗

秋七月癸巳汴梁等處大雨河決漂歸德數縣田廬
禾稼詔免田租一年遣尚書那懷御史劉賡等塞之
自蒲口首事凡築七十六所 壬寅召高麗王諫入
朝高麗王距既傳國於其子諫有言諫僭設司空司
徒等官而又擅殺其臣金呂中書請詔諫入朝因留
不遣復以距爲高麗王 江西江浙水 八月壬戌
太陰犯箕 九月丙申帝還大都庚戌減中外冗員
冬十月甲寅朔增海漕米爲七十萬石 十一月
庚寅罷雲南行御史臺置肅政廉訪司壬寅以中書
右丞王慶端爲平章政事 十二月戊午太白經天

辛未增置各路推官專掌刑獄上路二員下路一員詔諸逃軍復業者免役三年甲戌彗出子孫星下辛巳命廉訪司歲舉所部廉幹者各二人定歲課三十取一是歲諸王將帥共議備邊事咸曰敵往歲不冬出且可休兵于境駙馬高唐王闊里吉思獨嚴兵待之冬敵果大至闊里吉思三戰三克乘勝逐北馬躡爲敵所執誘使降不屈又欲妻以女闊里吉思毅然曰我天子婿也非天子命而可再娶乎竟不屈死焉

宋元通鑑卷第一百三十四

浙江圖書館

宋元通鑑卷第一百三十四

四

宋元通鑑卷第一百三十五

武進薛應旂編集

元紀七

起巳亥至壬寅
凡四年

成宗二

大德三年春正月己丑中書省臣以天變屢見請依故事引咎避位帝曰此漢人所說耳豈可一一聽從邪卿但當擇賢者任之耳時翰林學士閻復亦因星變上書陳數事且言古者刑不上大夫今郡守之貴以徵租受杖非所以勵廉隅江南公田租太重宜減以貸貧民多采用之 庚寅詔遣使問民疾苦除本

年內郡包銀俸鈔免江南夏稅十分之三增給小吏俸米置各路惠民藥局擇良醫主之 命中書省自今后妃諸王所需非奉旨勿給 辛卯浙西肅政廉訪使王邁犯贓罪託權幸規免命御史臺鞠治之 癸巳以答刺罕哈刺哈孫爲中書左丞相帝問閹復曰中書左相難其人卿試舉所知誰可任者復以哈刺哈孫對遂由江浙左丞相召入用之 二月癸丑朔帝如柳林 丁巳完澤等奏銓定省部官以次引見帝諭之曰汝等事多稽誤朕昔未知其人爲誰今旣閱視且知姓名其洗心滌慮各恭乃職復蹈前失

罪不汝貸 庚辰帝如上都 三月癸巳遣補陀僧
一山使日本詔曰有司奏陳向者世祖皇帝嘗遣補
陀禪僧如智及王積翁等兩奉璽書通好日本咸以
中途有阻而還爰自朕臨御以來綏懷諸國薄海內
外靡有遐遺日本之好宜復通問今如智已老補陀
寧一山道行素高可令往諭附商舶以行庶可必達
朕特從其請蓋欲成先帝遺意耳至於惇好息民之
事王其審圖之先是江浙平章政事也速答兒復勸
帝用兵日本帝曰今非其時因其俗奉佛遂遣一山
齋詔徃使而日本竟不至 甲午命何榮祖等更定

律令帝諭榮祖曰律令良法也宜早定之既而書成
上之且言臣所釋者三百八十條一條有該三四事
者帝曰古今異宜不必相沿詔元老大臣聚聽之未
及頒行而榮祖卒 夏四月己未太陰犯上將丙寅
填星犯輿鬼大陰犯心 庚午申嚴江浙兩淮私鹽
之禁 五月壬午罷江南諸路釋教總統所 庚子
復立征東行中書省高麗王拒既復爵既而使臣自
其國還者言拒不能服其衆乃復立征東行省以福
建都元帥闊里吉思爲平章政事共理之 六月戊
午申禁海商以人馬兵仗往諸蕃貿易 壬申歲星

晝見 秋七月庚辰中書省臣言江南編民五十餘

萬悉爲楊璉真伽冒入寺籍爲佃戶宜加釐正從之

丙申揚州淮安屬縣蝗在地爲鴛啄食飛者以翅

擊死詔禁捕鴛 八月己酉朔太史言是日巳時當

日食二分有奇至期不食衆懼保章正齊履謙曰當

食不食在古有之矧巳時近午陽盛陰微故當食不

食遂考唐開元以來當食不食者凡十事以聞 是

月汴梁大都河間水隆興平灤大同宣德等路雨雪

九月壬辰流星色赤尾長丈餘其光燭地起自河

鼓沒於牽牛之西有聲如雷 己亥帝還大都 冬

十月壬子冊伯岳吾氏爲皇后，后名十魯罕元貞。初立爲后，至是授冊寶。十一月庚辰，置浙西平江河渠閘堰凡七十八所。己亥，杭州火，江陵路蝗，並發粟賑之。十二月丙寅，詔各省戍軍輪次放還二年供役。癸酉，以阿魯渾薩里爲平章政事。初，帝撫軍北邊，數召阿魯渾薩里不往。世祖遣奉皇太子寶僅一至，及即位，語之曰：「朕在潛邸，誰不願侍朕者？惟卿數召不往，真得大臣體。」自是召對不名，賜坐視諸侯。王嘗語左右曰：「若全平章，真全材也。」命復入中書。阿魯渾薩里父別名萬全，故以全爲氏云。命兄子海

山鎮漠北海山帝兄答刺麻八刺之長子帝以寧遠
王濶濶出總兵北邊急于備禦命海山即軍中代之
省民出公田租時公田爲民害而荆湖尤甚部內
實無田隨民所輸租取之戶無大小皆出公田租雖
水旱不免荆湖宣慰使立智理威上民所不便十餘
事於朝而言公田尤切廷議遣使理之會有詔凡官
無公田者始給以俸民力少蘇焉以吳元珪爲工
部尚書時河朔連年水旱五穀不登元珪言春秋之
義以養民爲本凡用民力者必書蓋民力息則生養
遂生養遂則教化行而風俗美宰相嘉其言土木之

工稍息

四年春正月丙申申嚴京師惡少不法之禁犯者黥刺 二月丁未朔日食 丙辰皇太后弘吉刺氏崩 后有賢德事昭睿順聖皇后執婦道甚謹及尊爲太后置徽政院長其財賦院官有受獻浙西田七百頃者籍於位下后曰我寡居婦人衣食自有餘况江南率土皆國家所有曷敢私之即命盡易院官之受獻者后之弟欲因后求官后拒之曰勿以累我也崩謚徽仁裕聖皇后 乙亥帝如上都 三月乙未寧國太平兩路旱以糧二萬石賑之 夏四月戊午叅政

張頤孫及其弟珪等伏誅于隆興市。頤孫初爲新淦富人，胡制機養子，後制機自生子而制機死，頤孫利其貲，與珪謀殺其子，賂郡縣吏獲免。其僕胡忠訴主之寃于官，乃誅之。其貲悉還胡氏，以不蘭奚爲平章政事。五月癸未，帝諭集賢大學士阿魯渾撒里等曰：集賢翰林乃養老之地，自今諸老滿秩者陞之，勿令輒去，或有去者罪將及汝。其諭中書知之。緬人僧哥倫作亂，緬王執其兄阿散哥也，尋釋之。阿散哥也乃率其黨囚王於豕牢，因弒之。王次子奔愬京師，詔遣薛超兀兒等率行省兵二千人討之。六月

丁巳昭文館大學士平章軍國事不忽木卒初世祖
每聞不忽木之言必嘆曰恨卿生晚不得早聞此言
然亦吾子孫之福臨終以白璧遺之曰他日持此以
見朕也不忽木雖歷顯要而家素貧卒無以葬賜鈔
賻之贈魯國公謚文貞 秋八月癸卯朔更定蔭叙
格正一品子爲正五從五品子爲從九餘以是爲差
蒙古色目人特優一級 庚申緬國阿散吉牙等昆
弟赴闕自言殺主之罪罷征緬兵 閏月庚子帝還
大都 九月戊午太白犯斗壬戌太陰犯輿鬼建康
常州江陵饑民八十四萬九千六十餘人給糧二十

三萬餘石 冬十月癸酉朔有事于太廟 十一月
壬寅朔詔頒寬令 十二月庚寅遣雲南行省左丞
劉深將兵擊八百媳婦完澤因劉深之言勸帝曰世
祖以神武一海內功蓋萬世今陛下嗣大歷服未有
成功以彰休烈西南夷有八百媳婦未奉正朔請往
征之哈刺哈孫曰山嶠小夷遼絕萬里可諭之使來
不必遠厯兵力不聽竟發兵二萬命深及哈刺帶等
將之以往御史中丞董士選亦言不當輕信一人妄
言而真百萬生靈於死地帝變色曰事已成卿勿復
言麾之出

五年春正月庚戌給征八百媳婦軍鈔計九萬二千
餘錠 壬子御史臺臣言官吏犯贓避罪逃匿者宜
同獄成雖經原免亦加降黜庶奸偽可革從之 罷
征東行省先是征東行省平章闊里吉思言高麗王
擅署官府及僭用天子禮儀器物况官冗民稀刑罰
不一若止依本俗行事實難撫治帝遣刑部尚書王
忝亨等往釐正之既而高麗王拒言設行省監制其
國不便帝亦以闊里吉思不能和輯高麗遂罷行省
徵之還 二月己卯以劉深哈刺帶並爲中書右丞
鄭祐爲叅知政事 丁亥立征八百媳婦萬戶府二

設萬戶四員 丁酉帝如上都 三月丁卯熒惑犯
填星已巳熒惑填星相合 夏四月壬午調雲南軍
征八百媳婦 五月商州隕霜殺麥 壬戌雲南土
官宋隆濟叛時劉深等取道順元遠冒煙瘴未戰士
卒死者已什七八驅民轉餉谿谷之間一夫負粟八
斗率數人佐之數十日乃達死者亦數十萬人中外
騷然而深復令雲南調民供餽及脅求水西土官之
妻蛇節金三千兩馬三千匹隆濟因給其衆曰官軍
徵發汝等將悉剪髮黥面爲兵身死行陣妻子爲虜
衆惑其言遂叛 丙寅詔雲南行省自願征八百媳

婦者一千人給貝子六十索 六月丙戌宋隆濟率
苗犛紫江諸蠻四千人攻楊黃寨殺掠甚衆 壬辰
宋隆濟進攻貴州知州張懷德力戰敗死遂圍劉深
于窮谷中梁王闊闊兵救之賊衆稍却 秋七月戊
戌朔晝晦暴風起東北雨雹兼發江湖汎溢東起通
泰崇明西盡真州民被災死者不可勝計以米八萬
七千餘石賑之浙西積雨汎溢大傷民田詔役民夫
二千人䟽導河道俾復其故 八月甲戌遣薛超兀
等兵伐金齒諸蠻時征緬師還爲金齒所遮士多戰
死金齒地連八百媳婦諸蠻相效不輸稅賦賊殺官

吏故皆征之。庚辰詔遣官分道賑恤。凡獄囚禁繫

累年疑不能決者令廉訪司具其疑狀申呈省臺詳
讞仍爲定例。各路被災重者免其差稅一年。貧乏之
家計口賑恤尤甚者優給之。庚子彗出并歷紫微

垣至天市垣凡四十六日。九月丙辰江陵常德澧

州旱並免其門攤酒醋課。乙酉彗滅海都與篤哇

諸部大舉入寇海山躬督狀兀兒等五軍合擊大破
之。阿失射篤哇中膝號遁去海都不得志引還旋亦
死。放稱海守倉庫軍還令其以次更代。薛超兀
兒等兵攻阿散哥也不花引還言賊降在旦夕高慶

受其賂首倡爲還計是以無功詔遣官鞠之得薛超
兀兒以下將校受賂狀詔誅慶及察罕不花薛超兀
兒等遇赦削奪官爵爲庶人 冬十月丙辰朔以畿
內歲饑增明年海運糧爲百二十萬石 壬午帝還
大都丙戌以歲饑禁釀酒弛山澤之禁聽民捕獵
十一月己亥詔諭中書近因禁酒聞年老需酒之人
有預市而儲之者其無饜具者勿問 丁未遣劉國
傑率師討宋隆濟及蛇節時劉深兵敗帝始悔不用
哈刺哈孫及董士選之言乃遣劉國傑及楊賽因不
花等率四川雲南湖廣各省兵分道進討諸蠻別敕

梁王提兵應之軍中機務一聽國傑處分。是月減直糶米賑京師貧民設肆二十六所其老幼單弱不能自存者廩給。十二月甲戌歲星犯司怪。是歲各路螟蝗水旱不一。

六年春正月乙巳中書省臣言廣東宣慰副使脫歡察兒收捕盜賊屢有勞績近廉訪司劾其私置兵仗擅殺土寇等事遣官鞠問實無私罪乞加獎諭命賜衣二襲。罷朱清張瑄官一人父子致位顯要宗戚皆累大官田園館舍徧天下巨艘大舶交諸番中廩藏倉庾相望車馬填塞門巷僕從佩金虎符爲萬戶

千戶者累數十人江南僧石祖進摺其不法十事上
聞時中書省臣亦言二人屢致人言宜罷其官詔御
史臺詰問尋誅之帝語臺臣曰朕聞江南富戶侵占
民田以致貧者流離轉徙卿等嘗聞之否臺臣言曰
富民多乞護持璽書依倚以欺貧民官府不能詰治
宜悉追收爲便命即行之母越三日乙卯詔軍官
除邊遠出征其餘遇祖父母父母喪依民官例立限
奔赴宋隆濟累攻圍貴州不解劉深等糧盡道梗
不通遂引兵還隆濟復率衆邀之輜重委棄士卒殺
傷殆盡南臺御史中丞陳天祥上書諫曰八百媳婦

乃荒裔小夷取之不足以爲利不取不足以爲害而
劉深欺上罔下帥兵伐之經過八番縱橫自恣中途
變生所在皆叛旣不能制亂反爲亂衆所制食盡計
窮倉皇退走喪師十八九棄地千餘里朝廷再發四
省之兵使劉二拔都總督以圖收復湖南湖北大發
運糧丁夫衆至二十餘萬况當農時驅此愁苦之人
往廻數千里中何事不有比聞從征敗卒言西南諸
夷皆重山複嶺陡澗深林其窄隘處僅容一人一騎
上如登高下如入井賊若乘險邀擊我軍雖衆亦難
施爲或諸蠻遠遁阻隘以老我師進不得前旁無所

掠將不戰自困矣且自征伐倭國占城交緬諸夷以
來近三十年未嘗有尺土一民之益計其所費可勝
言哉去歲西徃及今此舉何以異之乞早正深罪仍
下明詔招諭彼必自相歸順不須遠勞王師與小醜
爭一旦之勝負也今爲之計宜駐兵近境多市軍糧
內安外固漸次服之此王者之師萬全之利也苟謂
業已如此欲罷不能亦當詳審成敗筭定而行彼諸
蠻皆烏合之衆必無久能同心捍我之理但急之則
相救緩之則相疑以計使之互相讐怨待彼有可乘
之隙我有可動之時徐命諸軍數道俱進服從者懷

之以仁抗敵者威之以武恩威兼濟功乃易成若復
舍恩任威深蹈覆轍恐他日之患有甚於今日者也不報遂謝病去 二月丙戌罷征八百媳婦右丞劉
深等官收其符印驛券 癸巳帝有疾釋京師重囚
三十八人命侍御史王壽奉香江南徧祠嶽鎮海瀆
密旨去歲風水爲災百姓艱食凡所經過採聽入對
使還具奏民之利病繫於官吏善惡在今宜選公廉
材幹存心愛物者專撫字剛方正大深識治體者居
風憲天災代有賑濟以時無勞聖慮惟是豪右之家
仍據權要當罷其職處之京師以保全之此長久之

道也。初壽與臺臣奏宰相內統百官外均四海位尊
任重不可輕假非人三代以降國之興衰民之休戚
未有不由相臣之賢否也。世祖初置中書省以忽魯
不花塔察兒線真安童伯顏等爲丞相史天澤劉秉
忠廉希憲許衡姚樞等實左右之。當時稱治比唐貞
觀之盛迨至阿合馬郝禎耿仁盧世榮桑哥忻都等
壞法黷貨流毒億兆近者阿忽台伯顏八都馬辛阿
里等專政煽惑中禁幾搖神器君子小人已試之驗
較然如此臣願推愛君思治之心邪正互陳成敗對
舉庶幾上悟天衷懲其既往知所進退天下之事可

從而理也。三月丁酉以旱溢爲災，詔赦天下。大都平灤被災尤甚，免其差稅三年。其餘災傷之地已經賑恤者，免一年。今年內郡包銀俸鈔江淮以南夏稅諸路鄉村人戶散辦門攤課程並蠲免之。烏撒烏蒙東川芒部及武定威楚普安諸蠻因蛇節之亂皆以供輸煩勞爲辭，乘釁起兵攻掠州縣焚燒堡砦，遣也速解兒等將兵會劉國傑討之。時國傑方討順元蠻不及來會也。速解兒等率師分道並進，次第平之。夏四月戊子，帝如上都。五月戊申，太廟寢殿災。六月癸亥朔，日食。太史院失於推策，詔議其罪。

甲子建文宣王廟于京師先是京師未有孔子廟而國子寓于他署至是左丞相哈刺哈孫奏始建立之

秋七月癸巳朔熒惑鎮星辰星聚井 辛酉以江

浙行省叅知政事忽都不丁為中書右丞 八月乙

丑熒惑犯歲星壬午太白犯軒轅 九月己酉龍興

民訛言括童男女至有殺其子者命捕為首者三人

誅之始息 冬十月丙子帝還大都 十一月甲午

劉國傑裨將宋光率兵大敗蛇節賜衣二襲仍授以

金符辛亥詔江南寺觀凡續置民田及民以施入為

名者並輸租充役 十二月辛酉御史臺臣言自大

德元年以來數有星變及風水之災民間乏食陛下
敬天愛民之心無所不盡理宜轉災為福而今春霜
殺麥秋雨傷稼五月太廟災尤古今重事臣等思之
得非荷陛下重任者不能奉行聖意以致如此若不
更新後難為力先令中書省與老臣識達治體者共
圖之復請禁諸路釀酒減免差稅賑濟饑民帝皆嘉
許中書即議行之 庚辰命中書省更定畧賣良
非例

浙

宋元通鑑卷第一百三十五

浙江圖書館

宋元通鑑卷第一百三十五

三

宋元通鑑卷第一百三十六

武進薛應旂編集

元紀八

起癸卯至乙巳凡三年

成宗三

大德七年春正月乙卯詔凡為匿名書辭語重者誅之輕者流配首告人賞鈔有差皆籍沒其妻子充賞命遣發米清張瑄妻子來京師仍封籍其家貲拘收其軍器海舶等物丁巳令樞密院選軍士習農業者十人教軍前屯田二月壬戌詔中書省汰諸有司冗員中書省自左右丞相而下平章政事二員

左右丞各一員參知政事二員定爲八府仍令諭樞
密院除出征將帥外掌署院事者定其員數以聞

辛未以阿老瓦丁木八刺沙並爲中書平章政事尚
文爲左丞董士珍爲參知政事 壬申詔樞密院宗

正府等自今每事與中書共議然後奏聞諸司不得
擅奏遷調官員雖經特旨用之而於例未允者亦聽

覆奏 庚辰御史杜肯構等言右丞相完澤受朱清

張瑄賄賂事不報 帝語中書省臣曰比有以歲課

增羨希求爵賞者此非掊刻於民何從而出自今除

元額外勿以增羨作正數 三月庚寅遣使宣撫循

行天下分爲七道江浙行省平章脫脫遣發朱清張瑄家屬其家以金珠重賂之脫脫以聞帝諭之曰朕以江南任卿果能爾真男子事也其益恪勤乃事賜以黃金五十兩都城火命中書省與樞密院議增巡防兵乙未中書平章伯顏梁德珪段真右丞八都馬辛左丞月古不花叅政迷兒火者張斯立等受朱清張瑄賄賂治罪有差詔皆籍其家甲辰詔定贓罪爲十二章京朝官月俸外增給祿米外任官無公田者亦量給之乙巳以征八百媳婦喪師誅劉深筈合刺帶鄭祐罷雲南征緬分省時有司會赦議

釋劉深罪。哈刺哈孫曰：微名首釁，喪師辱國，非常罪比。不誅無以謝天下。遂誅之。戊申，小蘭禧、岳鉉等進大一統志，賜賚有差。庚戌，樞密院臣及監察御史言中丞董士選貸朱清、張瑄鈔，非義。帝曰：臺臣稱貸不必問也。若言者不已，後當杖之。甲寅，帝如上都。夏四月庚午，中書左丞相答剌罕言僧人脩佛事畢，必釋重囚有殺人及妻妾殺夫者，皆指名釋之。生者苟免，死者負冤於福，何有？帝嘉納之。辛未，流朱清、張瑄子孫于遠方。浙庚辰，蛇節降。初，劉國傑討宋隆濟及蛇節，師出播州境，與賊遇，戰失利，乃令軍

士人持一盾而釘其上俟陣合即棄盾佯走賊果逐之馬遇盾皆仆國傑鼓譟趣之賊大敗旣而餘寇復合要戰國傑不應數日命楊賽因不花分兵先進大軍繼之賊兵潰乘勝逐北千里殺獲無筭遂破之於墨特川蛇節降隆濟遁去丁亥誅蛇節復以鐵哥爲平章政事初鐵哥乞解機務詔仍以平章議中書省事時諸王朝見未有知典故者帝曰惟鐵哥諳之凡賜予諸王禮節悉命掌行至是遂復以前官授之蘭谿處士金履祥卒履祥字吉父其先本劉氏後避錢武肅王嫌名更爲金氏履祥幼敏睿及長從學

同郡王栢及何基之門基則學于黃榦而榦則親得
朱熹之傳者宋將亡遂絕意進取屏居金華山中訓
迪後學諄切無倦及何基王栢之喪履祥率其同門
之士以義制服觀者始知師弟之繫于彝倫也履祥
嘗謂司馬文正公作資治通鑑劉恕爲外紀以記前
事不本于經而信百家之說是非謬于聖人不足以
傳信乃用邵氏皇極經世曆胡氏皇王大紀之例損
益折衷一以尚書爲主下及詩禮春秋旁採舊史諸
子表年繫事斷自唐堯以下接于通鑑之前勒爲一
書二十卷名曰通鑑前編以授門人許謙曰二帝三

王之盛其微言懿行宜後王所當法戰國申商之術
其苛法亂政亦後王所當戒則是編不可以不著也
當時以爲基之清介純實似尹和靖栢之高明剛正
似謝上蔡履祥則親得之二氏而並充於已者也居
仁山之下學者因稱仁山先生 五月己丑開上都
大都酒禁其所隸兩都州縣及山後河東山西河南
嘗告饑者仍悉禁之 壬辰以大德五年戰功賞北
師銀二十萬兩鈔二十萬錠幣帛各五萬九千匹
辛亥奉使宣撫耶律希逸劉賡言平陽僧察力威犯
法非一有司憚其豪強不敢詰問聞臣等至潛逃京

師中書省臣言宜捕送其所令省臺宣政院遣官雜
治從之 是月般陽路隕霜 閏月戊午朔日食

壬戌詔禁犯曲阜林廟者 己巳完澤卒澤土別燕

氏至元二十八年爲右丞相革桑哥弊政請自中統
初積年逋負錢穀悉蠲免之民賴其惠號爲賢相特
朱清張瑄之賂帝釋不問人猶疑之 辛巳詔僧人

與民均當差役 癸未命江浙行省右丞董士選發

所籍朱清張瑄貨財赴京師其海外未還商舶至則
依例籍沒 六月己丑御史臺臣言瓜沙二州自昔
爲邊鎮重地今大軍屯駐甘州使官民反居邊外非

宜乞以蒙古軍萬人分鎮二州險隘兼立屯田以供軍實爲便從之 秋七月壬戌禁僧人以脩建寺宇爲名賫諸王令旨乘傳擾民 丙寅答剌罕哈刺哈孫爲中書右丞相知樞密院事阿忽台爲左丞相 丁丑罷江南白雲宗攝所其田令依例輸租 篤哇旣敗聚其屬及海都之子謀遣使請命使至月赤察兒會諸王將帥議曰篤哇乞降事當待命於上然往返再閱月恐失事機乃使馬兀合刺往報之旣遣始以聞帝嘉之詔慎飭軍士安置驛傳以俟自是諸王叛者相率來歸 兩浙大饑平江等十五路霪雨害

稼詔發粟賑民一月仍減直鬻米三十萬石恊濟之
時台州諸路旱饑尤甚行省檄浙東元帥脫歡察兒
賑之脫歡察兒殘虐不恤治中陳孚訴于巡撫使亟
發廩民之殍者已十六七 八月辛卯夜地震平陽
太原尤甚村堡移徙地裂成渠壞廬舍萬八百區人
民壓死不可勝計詔問致災之由齊履謙言地爲陰
而主靜妻道臣道子道也三者失其道則地爲之不
寧弭之之道大臣當反躬責己去專制之威以答天
變不可徒爲祈禳也時帝寢疾宰臣及中宮專政故
履謙言及之而集賢大學士陳天祥亦上書極陳陰

陽不和天地不位為時政之弊言尤切直執政者惡之抑不以聞天祥自被召起且一歲每以不得一見帝言鬱鬱不自釋尋復謝病歸九月戊午帝還大都丙寅遣翰林直學士王約使高麗時高麗王昀既復位又罷征東行省監制昀乃復厚斂滯刑國人羣愬于朝因得其國相吳祈專權離間王父子狀詔遣約諭之曰天地間至親者父子至重者君臣彼小人知自利寧肯為汝家國地邪昀泣謝罪且請子諒還國奸人黨與悉從約治遂徵祈赴闕鞫之流安西壬午復以木八剌沙為平章政事冬十月戊子

以江浙年穀不登減海運糧四十萬石 癸巳御史

臺臣及諸道奉使言行省官久任多與所隸編民聯

姻殊為害政詔互遷之 庚戌翰林國史院進太祖

太宗定宗睿宗憲宗五朝實錄 辛亥增蒙古國子

生百員 十一月甲寅朔併海道運糧萬戶府為海

道都漕運萬戶府 辛酉木冰 十二月七道奉使

宣撫所罷賊污官吏萬八千七十三人賊四萬五千

八百六十五錠審冤獄五千一百七十六事 庚戌

彗出紫微垣僉樞密院千奴言蒙古軍在山東河南

者戍甘肅動涉萬里每行必鬻田產其或賣妻子戍

者未歸代者當發困苦日甚今邊陲無事而虛殫兵力誠爲非計乞以近甘肅之兵戍之而山東河南前戍者令有司爲贖其田產妻子從之 詔內外官七十者並聽致仕獨郭守敬以先朝舊德朝政多諮之累請謝事不許自是凡翰林太史官不許致仕著爲令

八年春正月己未以災異故詔天下恤民隱省刑罰 庚申雲南順元同知宣撫宋阿重生獲其叔隆濟來獻特陞其官賜衣一襲 是月平陽地震不止已脩民屋復壞皇后召平章政事愛薛問曰災異如此

殆下民所致邪愛薛曰天地示警民何與焉 二月

丙戌增置國子生二百員選宿衛大臣子孫充之

丙午帝如上都賜禿赤及塔刺以所籍朱清張瑄田
人六十頃 三月乙丑去歲彗星至是始滅凡七十

四日是月灤城濟陽等縣隕霜殺桑 夏四月丙戌

置千戶所戍定海以防歲至倭船 甲午詔諸王駙

馬進捕鷹鷂皆有定戶自今非鷹師而乘傳冒進者

罪之 丁未以國子生分教于上都 五月癸未朔

日食 辛酉以所籍朱清張瑄江南財產隸中政院

壬申中書省臣言吳江松江實海口故道潮水久

淤凡湮塞良田百有餘里况海運亦由是而出宜於
租戶役萬五千人濬治歲免租人十五石仍設行都
水監以董其程從之 是月大風雨雹衛輝陽武諸
處河溢 六月癸未開河林酒禁 是月旱蝗疾疫
秋七月辛酉罷江淮等處財賦總管府 八月太
原諸處雨雹隕霜殺禾杭州火 九月癸丑帝還大
都 庚申伯顏梁德珪並復為中書平章政事入都
馬辛復為中書右丞迷兒火者復為中書叅政以江
浙行省平章御史杜肯搆等言伯顏等樹黨受賕謫
戍遠方道路相慶方經數月遽聞召復相位又與原

鞠之人列坐朝堂天下之人目伯顏梁德珪八都馬
辛為二凶三凶不誅無以謝天下又况迷兒火者阿
里等與之同惡相濟濁亂朝綱是以比年災異屢見
雖朝廷存恤之詔累頒而禍亂之源未塞上失其政
民受其殃乞將羣凶或斥或誅明正其罪御史中丞
何通亦以為言前後章數十上皆不報 冬十月庚
寅封皇姪海山為懷寧王 十一月增海漕米為百
七十萬石 十二月庚子復立益都淘金總管府
召程鉅夫為翰林學士商議中書省事

九年春正月壬申弛大都酒禁 二月癸未中書省

臣言近侍自內傳旨凡除授賞罰皆無文記懼有差
違乞自今傳旨者悉以文記付中書從之 乙未建
天壽萬寧寺中塑祕密佛形象醜怪皇后幸寺見之
惡焉以帕障其面而過尋敕毀之 辛未令御史臺
翰林集賢院六部各舉廉能識治體者三人行省行
臺宣慰司廉訪司各舉五人 三月丁未朔帝如上
都 是月般陽益都河間諸路隕霜凡殺桑二百四
十一萬七十餘本 夏四月乙酉大同地震有聲如
雷壞官民廬舍五千餘間壓死二千餘人懷仁縣地
裂一所湧水盡黑漂出松栢朽木 壬辰始定郊祀

禮元初代有拜天之禮然皆徇用國俗郊祀之事自平金宋後猶未舉行至是哈刺哈孫等言祈天保民之事有天子親祀者三曰天曰祖宗曰社稷而祭天尤國之大事也陛下雖未及親祀宜如宗廟社稷歲時遣官攝行之制下翰林集賢太常及中書議之以爲周禮冬至圓丘禮天夏至方澤禮地西漢元始間始合祭天地歷東漢至宋千有餘年分祭合祭訖無定議然時旣不同禮樂亦異王莽之制何可法也今當循三代之典祀天南郊而方澤之禮續議以闡又按周作壇壝三成近代增四成以廣天文從祀之位

今宜去其一成以合陽竒之數每成高八尺一寸以
合乾之九九壇設丙巳之地以就陽位又古者器用
陶匏席用藁鞞以祀天漢唐而後禮樂玉帛日益繁
縟宋金多循唐禮今欲脩嚴非草創所能備舉宜取
唐制損益而行之既而太常復議尊祖配天之儀省
臣曰自古漢人有天下率尊祖以配天宗廟已有時
享郊止祭天爲宜中丞何瑋曰嚴父配天不易之制
也不從五月戊申詔求山林間有德行文學識治
道者遣使徵原任陝西儒學提舉蕭軒赴闕且曰或
不樂於仕可試一來與朕語而遣歸命有司給以安

車 戊午改各道肅政廉訪司爲詳刑觀察使 六

月丙子朔以立皇太子告昊天上帝及太廟庚辰立

子德壽爲皇太子 秋七月辛亥築郊壇于麗正文

明門之南丙位設郊祀署令丞太祝奉禮等官 壬

戌以金千兩銀七萬五千兩鈔十三萬錠賜兄答刺

麻八刺妃弘吉刺氏妃所生二子曰懷寧王海山曰

愛育黎拔力八達 丁卯以段真八都馬辛並爲中

書平章政事 八月丁丑給曲阜林廟灑掃戶以尚

珍署田五十頃供歲祀 丙戌商胡塔乞以珍寶來

獻議以鈔六十萬錠酌其直省臣有謂左丞尚文者

曰此所謂押忽大珠也六十萬斛之不爲過矣文問
何所用之答曰含之可不渴熨面可使目有光文曰
一人含之千萬人不渴則成寶也若一寶止濟一人
則用已微矣吾之所謂寶者米粟是也有之則百姓
安無則天下亂以功用較之豈不愈於彼乎 九月

庚申帝還大都

冬十月乙未帝諭中書省樞密院

御史臺臣曰省中政事聽右丞相答剌罕總裁自今
用人非與議者悉罷之 辛丑復以詳刑觀察司爲
廉訪司常州僧錄林起祐以官田二百八十頃冒爲
已業施河西寺敕募民耕種輸其租于官 是月帝

不豫中宮秉政詔遠愛育黎力八達與其母弘吉刺
氏出居懷州 十一月庚子祀昊天上帝于南郊牲
用馬一蒼犢一羊豕鹿各九其文舞曰崇德之舞武
舞曰定功之舞 十二月庚寅太子德壽卒

宋元通鑑卷第一百三十六

浙江圖

宋元通鑑卷第一百二十七

武進薛應旂編集

元紀九

起丙午至丁未凡二年

成宗四

大德十年春正月丙午濬吳松江等處漕河 戊午

罷江南白雲宗都僧錄司汰其民歸州縣僧歸各寺

田悉令輸租初南臺御史言江南寺觀田畝歷年詔

免租賦上虧公額下侵民利其所隸民戶或罹饑窘

為其徒者坐視不卹乞於秋成之時驗其頃畝減半

徵之以備凶歲惟賑其民庶幾利害稍均不加費於

官府也從之 壬戌發河南民十萬築河防 閏月

甲午以徹里阿散並爲平章政事 晉寧地震不止

二月辛亥中書省臣言近侍傳旨以文記至省者凡

一百五十餘人令臣擢用其中犯法妄進者實多宜

加遴選制可之 戊辰帝如上都 三月戊寅歲星

犯亢 夏四月癸亥置崑山嘉定等處水軍上萬戶

府 甲子倭商有慶等抵慶元貿易以金鎧甲爲獻

命江浙行省平章阿老瓦丁等備之 五月乙酉遣

高麗王諤還國時高麗王詎旣卒遂遣諤還仍置行

省鎮撫之諤尋更名章 秋七月大同之渾源隕霜

殺禾 八月壬寅開城路地震先是晉寧冀寧及諸郡地數震至是開城又大震壞王宮及官民廬舍壓死五千餘人 丁巳京師文宣王廟成行釋奠禮牲用太牢樂用登歌製法服三襲 九月己巳熒惑犯太微垣右執法尋犯左執法 冬十月吳江大水民饑發米萬石賑之 十一月己巳帝還大都 十二月帝以疾不愈禁天下屠宰四十二日 愛育黎拔力八達至懷州所過郡縣供帳華侈悉令撤去嚴飭扈從毋擾于民民皆感悅

十一年春正月丙辰朔帝大漸免朝賀癸酉崩于玉

德殿在位十有三年年四十三乙亥葬起輦谷從諸
帝陵 史臣曰帝承天下混一之後善於守成惟其
末年連歲寢疾國家政事內則決於宮闈外則委於
大臣其所以不至廢墜者則以去世祖未遠成憲具
在故也 卜魯罕皇后以已嘗謀出愛育黎拔力八
達及其母居懷州至是恐其兄懷寧王海山立必報
前怨乃命召安西王入京師欲立之左丞相阿忽台
平章賽典赤入都馬辛伯顏及諸王明里帖木兒陰
左右之謀斷海山歸路奉皇后垂簾聽政立安西王
輔之於是阿忽台以祔廟及攝位事集廷臣議之太

常卿田忠良博士張昇曰制祔廟必書嗣皇帝名今將何書御史中丞何瑋亦執不可阿忽台變色曰制自天降邪公等不畏死敢沮大事瑋曰死畏不義爾苟死於義何畏議遂寢時右丞相哈刺哈孫收百司符印封府庫稱疾守宿掖門內旨日數至皆不聽衆欲害之未敢發懷寧王適遣康里脫脫計事京師哈刺哈孫令急還報復遣使南迎愛育黎拔力八達于懷州使至懷州愛育黎拔力八達疑未行其傅李孟曰支子不嗣世祖之典訓也今宮車晏駕大太子遠在萬里殿下當急還宮廷以安人心愛育黎拔力八

達乃奉其母行先遣孟趨哈刺哈孫覘之適后使問疾哈刺哈孫所孟入長揖引其手診之衆謂孟醫也竟不疑旣而知安西之變有日還報曰事急矣不可不早圖之愛育黎拔力入達曰當以卜決之孟召卜者謂曰大事待汝而決第二云其吉及入筮果吉孟曰筮不違人是爲大同愛育黎拔力入達喜振袖而起衆翼之登騎諸臣皆步從庚寅至衛輝經比干墓顧左右曰紂內荒于色毒痛四海比干諫紂刳其心遂失天下令祀比干墓爲後世勸至漳河值大風雪田叟有以盂粥進者近侍卻不受愛育黎拔力入達曰

漢光武嘗爲寇兵所迫食豆粥大丈夫不備嘗艱隘
罔知稼穡以致驕惰命取食之賜叟綾一疋慰遣之
二月辛亥愛育黎拔力入達至大都與母弘刺氏
入內哭盡哀復出居舊邸安西之黨見愛育黎拔力
入達旣至遂謀以三月二日僞賀其生辰因以舉事
哈刺哈孫許之夜遣人啓愛育黎拔力入達曰懷寧
王遠不能猝至恐變生不測當先事而發愛育黎拔
力入達復遣都萬戶囊加歹詣諸王禿刺定計囊加
歹力贊之乃先二日三月丙寅率衛士入內稱懷寧
王遣使召安西計事至即并諸王明里帖木兒執之

鞫問辭服械送上都收阿忽台入都馬辛賽典赤伯
顏等誅之諸王闊闊出牙忽都進曰今罪人斯得太
子實世祖之孫宜早正大位愛育黎拔力入達曰王
何爲出此言也彼惡人潛結宮壺亂我家法故誅之
豈欲作威福以覬望神器邪懷寧王吾兄也宜正大
位已遣使奉璽北迎之矣遂自監國與哈刺哈孫日
夜居禁中以備變俾李孟叅知政事孟損益庶務裁
抑僥倖羣小多不樂旣而曰執政大臣當自天子親
用今鑾輿在道孟未見顏色誠不敢冒大任固辭弗
許遂逃去不知所之 夏五月乙丑懷寧王海山至

上都初海山聞帝崩自按台山至和林諸王勲戚合
辭勸進王曰吾母及弟在大都俟宗親畢會議之愛
育黎拔力八達旣平內難其母弘吉刺妃惑於日者
言欲海山讓位於愛育黎拔力八達海山聞之語康
里脫脫曰我捍邊陲十年又胤次居長星命之言茫
昧難信設我即位後所行上合天心下副民望則雖
一日之短亦足垂名萬年何可以陰陽家言而乖祖
宗之託哉此殆用事之臣擅權專殺恐他日或治其
罪故爲是奸謀爾汝爲我往察事機疾歸報我乃親
率大軍由西道諸王按灰由中道狀兀兒由東道各

以勁卒一萬從而遲迴不進脫脫馳至大都入道海
山言妃愕然曰脩短之說雖出術家爲太子周思遠
慮乃我深愛今貪黷已除宗王大臣議已定太子不
速來何爲汝所致言殆有讒間汝歸爲我彌縫之而
趣其來先是妃以懷寧王海山不至復遣阿沙不花
迎之備道安西謀變始末及大弟監國與諸王羣臣
推戴之意至是脫脫繼往行至中道海山輿中望見
之趨使同載脫脫備述妃言懷寧王大感悟至是至
上都即以阿沙不花爲平章政事遣還報兩宮愛育
黎拔力八達即侍其母來會于上都廢皇后伯岳吾

氏居東安殺之誅安西王阿難答及諸王明里帖木
兒甲申懷寧王即位詔曰昔我太祖皇帝以武功
定天下世祖皇帝以文德洽海內列聖相承丕衍無
疆之祚朕自先朝肅將天威撫軍朔方殆將十年親
御甲冑力戰却敵者屢矣方諸蕃內附邊事以寧遽
聞宮車晏駕廼有宗室諸王貴戚元勳相與定策於
和林咸以朕爲世祖曾孫之嫡裕宗正派之傳以功
以賢宜膺大寶朕謙讓未遑至於再三還至上都宗
親大臣復請於朕間者姦臣乘隙謀爲不軌賴祖宗
之靈母弟愛育黎拔力八達稟命太后恭行天罰內

難既平神器不可久虛宗祧不可乏祀合辭勸進誠
意益堅朕勉徇輿情於五月二十一日即皇帝位任
大守重若涉淵冰屬嗣服之云初其與民更始可大
赦天下追尊考曰順宗皇帝尊母弘吉刺氏爲皇太
后加哈刺哈孫朶兒朶海並太傅阿沙不花太尉以
塔刺海爲左丞相狀兀兒乞台普濟明里不花並平
章政事六月癸巳朔立弟愛育黎拔力八達爲皇
太子受金寶遣使四方旁求經籍識以玉刻印章命
近侍掌之時有進大學衍義者命詹事王約等節而
譯之皇太子曰治天下此一書足矣因命與圖象孝

經列女傳並刊行賜臣下以狀兀兒不蘭奚並爲

平章政事秋七月癸亥朔封秃刺爲越王左遷右

丞相哈刺哈孫爲和林左丞相以月赤察兒爲和林

右丞相進爵淇陽王初皇太子入定內難阿忽台有

勇力人莫能近秃刺實手縛之以功封越王哈刺哈

孫力爭以爲舊制非親王不得加一字之封秃刺疏

屬豈可以一日之功廢萬世之制帝不聽秃刺因諧

于帝曰安西謀干大統時丞相亦嘗署其牘由是罷

爲和林行省左丞相仍太傅復錄軍國重事哈刺哈

孫至鎮斬爲盜者一人分遣使者賑貸降民奏出鈔

帛易牛羊以給之近水者教取魚鱉爲食命諸部置
傳車相去各三百里凡十傳轉米數萬石以餉饑民
又度地置倉廩積粟以待來者求古渠浚之溉田數
千頃治稱海屯田令部民雜耕其間歲得米二十餘
萬北邊大治 己巳置宮師府設太子太師少師太
傅少傅太保少保賓客左右諭德贊善庶子洗馬率
更令丞司經令丞中允文學通事舍人校書正字等
官 丁丑以塔刺海爲右丞相塔思不花爲左丞相
塔失海牙教化法忽魯丁別不花並平章政事 辛
巳制加孔子號曰大成制曰先孔子而聖者非孔子

無以明後孔子而聖者非孔子無以法所謂祖述堯
舜憲章文武儀範百王師表萬世者也可加大成至
聖文宣王遣使闕里祀以太牢於戲父子之親君臣
之義求惟聖教之遵天地之大日月之明奚罄名言
之妙尚資神化祚我皇元

以都指揮使馬謀沙及
伶官沙的等並爲平章政事謀沙以角觝屢勝遙授
平章政事沙的等授平章仍領玉宸樂院使未幾樂
工有犯法者刑部逮之沙的以玉宸與刑部秩皆三
品官皆榮祿大夫留不遣中書以聞帝曰凡諸司視
其資級授之散官不可超越其閑冗職名官高者宜

遵舊制降之

八月甲午中書省臣言內降旨與官

者八百八十餘人已除三百未除者猶五百餘請自
今越奏者乞勿與又外任官多帶相銜非制御史臺
臣亦言御史廉訪司官宜從本臺公選不當從諸臣
所請降內旨用之帝曰若此者卿等皆當執勿與未
幾省臣復言比有應入常調者或未入仕及已嘗廢
黜者亦復請自內降已嘗奉詔禁革之後所降內旨
復有百餘臣等竊謂中書政務他人輒得干請如此
責效實難自今銓選錢穀之事不由中書議者不得
奏聞從之 辛亥中書右丞孛羅帖木兒以國字譯

孝經進詔曰此孔子之微言王公庶民皆當由是而

行命刻板模印諸王以下咸賜之 戊午以塔海爲

平章政事 九月甲子帝至自上都 壬申上皇考

及大行皇帝尊謚皇考廟號順宗大行皇帝廟號成

宗又尊太母元妃弘吉剌氏爲皇后祔成廟 庚子

中書省臣言初置中書省時裕宗爲皇太子嘗至省

署敕行中書令事後桑哥選立尚書省不四載而罷

今復建中書於舊省乞徙中書令位請皇太子入省

一蒞之制可 乙巳禁方士日者毋游諸王駙馬之

門 丙辰中書省奏常歲海漕糧百四十五萬石今

江浙歲儉不能如數請仍舊例湖廣江西各輸五十萬石並由海道達京師從之 十一月乙亥皇太子

言近蒙恩以安西吉州平江爲分地租稅悉以賜臣臣恐宗親昆弟引例自五戶絲外餘請輸之內帑其陝西運司歲辦鹽十萬引向給安西王以此錢斟酌與臣惟陛下裁之帝曰太子所思甚善歲以十萬錠給之不足則再賜 戊寅皇太子受玉冊領中書省

樞密院 十二月壬辰朔中書省臣言舊制金虎符及金銀符典瑞院掌之給則由中書事已則復歸典瑞院今出入多不由中書下至商人結托近侍奏請

以致泛濫出而無歸臣等請覈之自後除官及奉使
應給者非由中書省勿給從之 山東饑遣禮部尚

書吳鼎往賑之時議發米四萬石以鈔折之鼎曰民
得鈔將何從易米請即以米行 庚申詔改大德十

二年爲至大元年 徵處士蕭軒爲太子右諭德軒

字惟斗陝西奉元人初出爲府史上官語不合即引

退讀書南山者三十年不求進博極羣書及門受業

者甚衆鄉人有暮行遇盜詭曰我蕭先生也盜驚愕

釋去世祖時辟爲陝西儒學提舉不赴後累授集賢

直學士國子司業改集賢侍讀學士皆不赴至是徵

拜太子右諭德扶病至京師入覲東宮書酒誥為獻
以朝廷時尚酒故也尋以病請解職或問之則曰禮
東宮東面師傳西面此禮今可行乎俄擢集賢學士
國子祭酒依前右諭德疾作固辭而歸卒謚貞敏同
時有韓擇字從善侯均字伯仁周恕字寬甫恕弟子
第五居仁字士安皆奉元人以學行名振關中學者
宗之

宋元通鑑卷第一百三十七



浙江圖書館



浙江圖書館



浙江圖書館

浙江圖書館善本

















甲 登記號：030007

一九 年 月 日



浙江圖書館

colorchecker CLASSIC



x-rite



